

# Dari Sebulan ke Sebulan

Di dalam suatu jamuan teh yang diadakan oleh pemuda Jamiyah al-Da’wah al-Islamiyyah, Singapura meraikan Dr. Haji Ahmad bin Mohamed Ibrahim Peguam Agung kerajaan Singapura kerana mendapat tauliah Doktor di dalam undang-undang Islam, di antara lain telah berkata lebih kurang: “Saya adalah berasa malu digelar seorang yang ahli (autoriti) di dalam undang-undang Islam padahal saya hanya membaca kitab-kitab di dalam bahasa Inggeris *al-Risālah* karangan Imam Shāfi‘ī dan *Minhāj al-tālibīn* karangan Imam Nawāwī – itupun hanya terjemahannya sahaja. Bagaimanakah dengan hanya yang demikian itu boleh menjadikan saya seorang ahli di dalam hukum Islam.” Pengakuan Tuan Dr. Haji Ahmad bin Mohamed Ibrahim yang berterus terang ini dengan secara ikhlas itu patut dipuji dan daripada itu beliau menyedari bahawa beliau bukan ahlinya di dalam syarak Islam – beliau hanya mengetahui sedikit juu itu pun daripada terjemahan daripada bangsa-bangsa Barat. Dengan kesedaran ini kita berharap kerana beliau seorang ahli undang-undang dan penggubal undang-undang Islam yang bakal dikemukakan untuk disahkan di dalam Majlis Undangan negara ini semoleknya sebelum dikemukakan itu beliau meminta ahli-ahli agama walaupun tidak mendapat tauliah dari mana-mana universiti tetapi diketahui alim di dalam hukum Islam patut diminta fikirannya dan pendapatnya supaya undang-undang itu tidak kelak dipandang tersalah bawa dan bertentangan dengan dasar syarak yang diturunkan oleh Allah.

Almarhum Abdul Qadir Awdah seorang hakim dan seorang Islam kalau menggubal suatu undang-undang selain daripada undang-undang Allah dan bertentangan dengan undang-undang itu, menurut beliau, dengan beberapa alasan daripada al-Qur’ān yang dihujahkan beliau, perbuatan yang demikian itu adalah perbuatan kufur – Berlindunglah kita kepada Allah yang demikian.

\* \* \*

Di dalam perjumpaan yang dibuat oleh Perdana Menteri Lee Kuan Yew dengan anggota-anggota badan pertubuhan-pertubuhan agama yang terbit kerana tulisan seorang pengisi ruangan di dalam akhbar Melayu di Persekutuan Tanah Melayu mengenai dakyah Kristian, beberapa orang Islam anggota pertubuhan itu ada bersama. Mereka adalah ahli atau anggota jawatankuasa pertubuhan agama itu dan kehadirannya tentulah bukan mewakili orang Islam Singapura seluruhnya. Di antaranya ada pula seorang diplomatik wakil kerajaan ‘Arabiyyah Sa‘udiyyah yang bukan rakyat Singapura. Perdana Menteri Lee Kuan Yew telah mengatakan bahawa “wakil-wakil” Islam itu adalah orang yang terkenal baik dan tidak peminum serta tidak memakan barang-barang yang haram. Orang hanya mendengar sahaja apa yang dikatakan oleh Perdana Menteri itu dan tidak dapat berkata apa-apa bagi mengukur orang-orang yang dikatakan wakil orang-orang Islam yang tersebut kerana mereka berfikir siapakah yang lebih tahu keadaan seseorang itu selain daripada golongan dan puaknya?

\* \* \*

Untuk menarik perhatian pelancong kerajaan Singapura telah bercadang menjadikan sebuah pulau bernama Pulau Sejahat yang terletak tidak berapa jauh daripada Changi untuk tempat-tempat bersuka ria – diadakan kasino, permainan-permainan dan sebagainya untuk menghiburkan pelancong-pelancong. Dirancangkan juga bahawa akan diadakan kapal kecil untuk membawa pelancong-pelancong dari Clifford Pier berulang-alik ke tempat itu. Tentunya tempat itu tempat mandi-manda, dansa-dansi dan segala-galanya dibuat kalau dibuka kisah-kisah lama semenjak PETIR memegang kerajaan tentu orang akan garuk kepala memikirkan kerana sedikit permainan nampak paha dan sedikit-sedikit gambar-gambar yang dikeluarkan di majalah-majalah dengan baju mandi tiga suku telanjang adalah dikatakan kebudayaan kuning tetapi sekarang lahir apa


yang dikatakan kuning itu telah jadi putih (halal) kerana ia dibuat oleh kerajaan. Begitulah cara hidup di dunia!

\* \* \*

Pulau Senang yang terletak dua belas batu sebelah selatan Singapura dicadangkan oleh Perdana Menteri Lee Kuan Yew untuk tempat bertukar-tukar perniagaan di antara Singapura dengan Indonesia yang sedang berkonfrontasi dengan Malaysia termasuk Singapura. Rancangan itu adalah kerana bertujuan untuk menambahkan hasil mahsul dan memberi peluang kerja-kerja kilang-kilang di Singapura yang penduduknya hampir-hampir dua juta orang. Katanya segala perahu-perahu dan *motorboat* yang datang hendaklah diarahkan ke pulau itu dan untuk menjaga supaya jangan ada penyeludupan bolehlah di antara pulau itu dengan pantai dijaga dengan rapi. Menjaganya tentulah bersama-sama di antara Malaysia dan Singapura sedang hasilnya tentulah Singapura sahaja yang mendapat. Kalau jadi mungkin membawa keuntungan tetapi sebaliknya kalau penyeludupan berlaku mungkin kerugian-kerugian lebih dari keuntungan yang didapat. Kerana pertahanan Malaysia dan Singapura bersatu sudah tentu rancangan ini tidak dapat dijalankan kalau tidak dengan persetujuan Malaysia sedang Tengku Abdul Rahman sendiri memperingatkan supaya Perdana Menteri Singapura berhati-hati dalam soal ini dan berfikir atas akibat-akibat yang akan terjadi. Daripada apa yang dilihat setiap masa nampaknya sesudah Singapura menjadi sebuah negara Ketua Negara selalu mengeluarkan kata-kata yang tidak difikirkan lebih halus akibat-akibat daripada kata-katanya.

\* \* \*

Komunis sekarang diburu dengan hebatnya di Indonesia. Kalau dahulu gembung-gembung Komunis Indonesia mengeluarkan kata-katanya berapi-api di dalam perjumpaan umum dan menyerang kedutaan-kedutaan asing selain daripada Komunis di Indonesia, sekarang telah menjadi terbalik awah<sup>1</sup>. Dengan tentera yang cuba diruntuhkan oleh Komunis menjadi tulang belakang rakyat – anti-



*Jalālah al-Malik Faisal raja bagi kerajaan ‘Arabiyyah*

*Sa‘udiyah sedang berbual-bual dengan al-Malik Hussein raja bagi Jordan dalam menghadiri Persidangan Negara-negara Arab baru-baru ini di Morocco.*

---

Komunis telah hidup marak di Indonesia dan golongan Islam yang mendapat petua daripada ulama-ulamannya bahawa Komunis itu seteru Allah dan seteru Islam telah bergerak bukan sahaja menuntut supaya Komunis diharamkan tetapi juga menuntut China Komunis yang membelanjai Komunis Indonesia itu diputuskan perhubungan diplomatnya dengan Indonesia. Ini lebih-lebih lagi apabila mereka mengetahui bahawa Komunis China telah menyeludupkan senjata-senjata ke Indonesia yang bertujuan menubuhkan kerajaan Komunis di Indonesia yang kebanyakannya rakyatnya penganut Islam. Semoga kekuatan tenaga umat Islam di Indonesia lebih kompak dan lebih maju!

\* \* \*

Ustaz Salleh Othman Pengetua Pertadbiran Pelajaran

Agama di sekolah-sekolah di Persekutuan Tanah Melayu telah menjadi tumpuan dan sasaran serangan-serangan atas penjelasan beliau terhadap beberapa perkara di dalam hukum-hukum agama. Serangan-serangan itu datangnya dari golongan-golongan yang berpegang kepada pendapat Imam Shafi‘ī yang menjadi ikutan kebanyakan umat Islam di Tanah Melayu ini dan ikutan jabatan-jabatan agama di Tanah Melayu di dalam mendasarkan hukum-hukum ibadah dan

---

<sup>1</sup> Perkataan sebenar ialah arah.

lainnya. Yang tidak memegang dasar ini hanya sebuah sahaja negeri iaitu Perlis. Tidaklah hairan serangan didatangkan kepada Ustaz Salleh Othman kerana dia berasal dari Perlis dan daripada golongan *ittibā' al-sunnah XXX*<sup>2</sup> yang hanya berpegang kepada kitab Allah dan sunnah sahaja. Persoalan yang serupa ini tidak akan boleh tamat sampai bila pun kalau umat Islam sendiri tidak cukup memahami selok-belok dan pendapat-pendapat mazhab-mazhab dan ulama-ulama yang terkenal di dalam persoalan-persoalan itu. Ini akan dapat dikurangkan hanya apabila ada sesuatu golongan, dengan bantuan daripada kerajaan, bagi mengadakan sebuah kitab agama yang luas dan besar dengan mendasarkan segala hukum-hukumnya dengan luas di dalam mazhab al-Imām Shafī‘ī dan kemudian menjelaskan suatu matan jika ada perselisihan di dalam sesuatu masalah itu dengan menjelaskan pendapat lain-lain imam di dalam persoalan itu supaya seseorang tidak akan memusuhi seseorang apabila pendapatnya berselisih di dalam sesuatu hukum sebab mereka telah mengetahui tentang perselisihan itu yang telah berjalan beribu-ribu tahun lamanya. Dengan berangsur-angsur<sup>3</sup> begini tidaklah umat menjadi fanatic kepada sesuatu faham. Kerajaan patut berusaha mengusahakan ini ataupun membantu badan-badan penerbitan Islam bagi mengadakannya yang selari dengan dasar dan usaha mengganti kitab-kitab yang lama yang bahasanya payah difaham supaya sebenar-benarnya umat difahamkan dan diajar hakikat-hakikat Islam. Tidak ada gunanya masjid banyak, kalau tidak ada isinya dan tidak ada faedahnya menyeru umat bersatu kalau jalan-jalan memberi persefahaman tidak diusahakan dan digalakkan.

\* \* \*

Masjid ialah tempat ibadah yang suci dan dimuliakan. Masjid-masjid hendaklah diasaskan di atas dasar takwa dan membuat masjid-masjid itu hendaknya janganlah diambil daripada wang-wang syubbah. Jika masjid-masjid itu didirikan di atas wang-wang syubbah dan tidak didirikan di atas dasar-dasar takwa maka masjid itu disebut masjid *dirār* dan Rasulullah (S.A.W) telah memerintahkan masjid seperti itu diruntuhkan atau dibakar. Setahun dua tahun dahulu

apabila Kerajaan Persekutuan membuka jalan hasil-hasil loteri kebajikan diberikan kerana membina masjid, surau dan madrasah-madrasah, pertengangan-pertengangan dan perbahasan-perbahasan hebat telah berlaku di dalam akhbar dan akhirnya Kerajaan Persekutuan telah menyatakan bahawa hasil-hasil loteri kebajikan itu dimasukkan ke dalam khazanah kerajaan. Kemudian segala rancangan pembinaan luar bandar dilaksanakan dan rancangan-rancangan itu termasuk bantuan-bantuan membina masjid, surau dan seumpamanya dengan sokongan dan bantuan rancangan luar bandar itu. Dari mana wang rancangan luar bandar itu didapat tidaklah dipersoalkan lagi dan di sana sini mercup masjid-masjid dan surau-surau dibina. Tetapi baru-baru ini Menteri Muda Pelajaran dan kemudian Menteri Hal Ehwal Kebajikan Masyarakat A. Abdul Hamid Khan menjelaskan bahawa 78 juta ringgit wang telah dikumpulkan dan wang-wang itu telah digunakan di antaranya telah membina masjid-masjid dan surau-surau – erti-nya masjid-masjid dan surau-surau yang dibina itu adalah dari wang Loteri Kebajikan Masyarakat. Apakah kata orang Islam dalam soal ini?

---

Syeikh Muhammad Nazib salah seorang ahli jawatankuasa penyokong Pakistan di Jeddah bersama-sama dua orang lagi telah menyampaikan cek sebanyak 330,000 riyal kepada duta Pakistan di Jeddah sebagai sebahagian daripada pungutan-pungutan membantu Pakistan di dalam jihadnya menegakkan kerajaan Kashmir daripada rempuhan India dan sebagai bantuan kepada saudara-saudara Islam di Kashmir.

---

Suatu rancangan telah dibuat oleh Mufti Palestin, al-Haj Amin Husseini bagi menghantar suatu rombongan yang mengandungi wakil-wakil Islam dari beberapa buah negeri kerana melawat ke negeri-negeri Islam bagi mengucapkan terima kasih atas persaudaraan Islam yang menyokong Pakistan dan bagi mengambil fikiran-fikiran atas kedudukan orang-orang Islam di Kashmir.

<sup>2</sup> Teks asal tidak jelas.

<sup>3</sup> Perkataan sebenar ialah beransur-ansur.

baik terhadap kedatangan Nabi. Dengan serta-merta di langit yang pertama Nabi berjumpa dengan Nabi Ādam; dan Jibrīl meminta Nabi menyampaikan ucapan salam kepadanya dan Ādam pun menjawab salam sambil menyambut kedatangan Rasulullah dan mendoakan kebaikan bagi beliau, sebagai sambutan seorang ayah kepada anaknya.

10. Sesudah itu dengan serta-merta Nabi melihat wujudnya suatu benda yang berupa hitam yang ada di kanan dan di kiri tempat duduk Ādam. Apabila Ādam menoleh ke kanan, ia ketawa dan apabila Ādam menoleh ke kiri, ia menangis. Melihat itu Nabi bertanya keadaan itu kepada Jibrīl dan juga menerangkan bahawa itu adalah roh anak-anak Ādam – di sebelah kanannya ialah syurga dan di sebelah kirinya itu ialah neraka.

11. Kemudian Jibrīl beserta Nabi naik ke langit yang kedua dan setibanya di situ Jibrīl dibukakan pintu lalu ditanya oleh penjaga-penjaga di situ seperti pertanyaan di langit yang pertama. Pertanyaan-pertanyaan dijawab Jibrīl seperti jawapan yang diberi kepada penjaga langit yang pertama. Penjaga langit itu membuka pintu sambil mengucapkan keselamatan dan kehormatan kepada Nabi seperti yang berlaku pada langit yang pertama. Di langit yang kedua Nabi bertemu dengan Nabi ‘Isā dan Yaḥyā. Di sini Nabi mengucapkan salam kepada kedua beliau itu dan salam Nabi itu dijawab mereka dengan hormat dan baik dengan kata sambungan daripada saudara kepada saudaranya.

12. Kemudian Nabi naik ke langit yang ketiga dan berlakulah pertanyaan-pertanyaan dan jawapan-jawapan seperti pada langit yang kedua dan Nabi di sini telah berjumpa dengan Nabi Allah Yūsuf seorang Nabi yang dikurniai dengan kecantikan paras. Nabi memberi salam kepada Nabi Yūsuf dan

salam Nabi dibalas dengan cara kehormatan saudara kepada saudaranya.

13. Kemudian mereka naik ke langit yang keempat dan Nabi mendapat kehormatan sebagai di langit yang ketiga. Di sini telah bertemu dengan Nabi Idrīs dan Nabi telah menyampaikan salam kepadanya dan salam itu dijawab dengan menyambung ucapan sebagai penghormatan kepada Nabi sebagaimana sambutan dan penghormatan seorang saudara terhadap kepada saudaranya.

14. Nabi bersama Jibrīl naik ke langit yang kelima dan di sana berjumpa dengan Nabi Hārūn.

15. Nabi naik ke langit yang keenam dan di sana bertemu dengan Nabi Mūsā ‘alayhi al-salām.

16. Tatkalah Nabi berjalan melalui Nabi Mūsā, Nabi Mūsā menangis tersedu-sedu dan tatkala menjawab pertanyaan mengapa ia menangis, Nabi Musa menjawab: “Kerana saya mengetahui bahawa seorang pemuda yang diutus oleh Allah pada masa kemudian daripada saya umatnya lebih banyak yang masuk syurga daripada umat saya.”

17. Nabi naik ke langit yang ketujuh dan di sana Nabi bertemu dengan Nabi Ibrāhīm yang sedang bersandar di *Bayt al-Ma’mūr*.

18. Nabi diperlihatkan *Bayt al-Ma’mūr* iaitu sebuah tempat ibadah sekalian malaikat yang setiap hari tujuh puluh ribu kali malaikat masuk ke dalamnya dan apabila mereka keluar dari tempat itu, mereka tidak mengulangi masuknya lagi.

19. Nabi dinaikkan ke *Sīdrah al-Muntahā* dan di sana Nabi melihat daun-daun *sīdrah* itu seperti telinga gajah dan buahnya seperti kendi negeri Hijir. Di sana Nabi